

Inatsisartunut aalajangiiffigisassatut siunnersuutigineqarpoq Naalakkersuisut peqquneqassasut Inatsisartut 2017-imi upernaakkut ataatsimiinnerannut atatillugu ukiunut sisamanut misileraataasumik aqqississuussineq, nammineq inigisap aserfallatsaalineqarneranut imaluunniit nukimmik sipaarnerunissamut sanasunik suliaqartitsinermut atatillugu aningaasartuutit katillugit 20.000,00 kr inummut ataatsimut akileraarutitigut ilanngaatigineqarsinnaalernissaanik suliaqassasut. Ukiut misileraataaffiusut tamarmik ukiumut 3.000.000 kr-nik aningaasanut inatsisitimmi illikartitsiviussaaq. Ukiut sisamat misileraataaffiusut ingerlarcerpata misileraaneq nalilersuiffigineqassaaq.

Atassutip Inatsisartunut ilaasortaaitaanit saqqummiunneqartoq

pillugu

Aningaasaqarnermut Akileraarnermullu Ataatsimiititaliap

siunnersuutip aappassaaneerineqarneranut

ISUMALIUTISSIISSUTAA

Ataatsimiititaliap kingullermik ilaasortarai:

Inatsisartunut ilaasortaq Jens Immanuelson, Siumut, siulittaasoq

Inatsisartunut ilaasortaq Randi V. Evaldsen, Demokraatit, siulittaasup tullia

Inatsisartunut ilaasortaq Nikolaj Jeremiassen, Siumut

Inatsisartunut ilaasortaq Jess Svane, Siumut

Inatsisartunut ilaasortaq Ane Hansen, Inuit Ataqatigiit

Inatsisartunut ilaasortaq Peter Olsen, Inuit Ataqatigiit

Inatsisartunut ilaasortaq Bendt B. Kristiansen, Inuit Ataqatigiit

Siullermeerinnineq UKA2016-imi 20. oktober 2016-imi ingerlanneqarpoq, tamatumalu kingorna ataatsimiititaliap siunnersuut misissorpaa.

Siunnersuutip imarisaa siunertaalu

Namminerisamik inillit nukimmik sipaaruteqarnissamut inissiaminnillu aserfallatsaaliinissamut kajumissuseqalersinneqarnissaat kiisalu sanasut suliaqartut amerlinissaat siunnersuutip siunertaraa. Misiligutitut aqqissuussineq akileraarutitigut ilanngaatit aqutigalugit aningaasalersorneqartussaq siunnersuutigineqarpoq, tamannalu akileraarutinit iluanaarutissaraluanik annaasaqarnermik nassataqassaaq, tamatumani apeqqutaassalluni innuttaasut siunnersuummik atuisut qanoq amerlatigissanersut. Siunnersuutigineqarpoq inummut ataatsimut ilanngaat

20.000 kr.-iunissasoq aammalu piffissami ukiunik sisamanik sivilisussuseqartumi aningaasanut inatsisikkut ukiumoortumik 3 mio. kr.-inik immikkoortitsisoqartarnissaa.

Siunnersuutip kingunerisaanik Naalakkersuisut allannguutissatut siunnersuuteqarput, tassa akileraartarnermut tunngasut misissorneqarnerat ingerlanneqalereermat.

Naalakkersuisut allannguutissatut siunnersuutaat:

”Akileraartarfimmi suliniutinut allanut atatillugu nammineq inigisap aserfallat-saalineqarneranut imaluunniit nukimmik sipaarnerunissamut sanasunik suliaqartitsinermut atatillugu aningaasartuutit akileraarutitigut ilanngaatigineqarsinnaalernissaanik eqqussinissamut periarfissat misissuinissamut Naalakkersuisut pequneqassasut Inatsisartut aalajangiiffigisassaattut siunnersuut.”

Naalakkersuisut allannguutissatut siunnersuutaat Inatsisartunit taparserneqassappat sanasunut ilanngaammik atuutsitsilernissamut periarfissat pillugit allakkianngorlugu Naalakkersuisut nassuiaammik annertunngitsumik suliaqassapput, taannalu kingusinnerpaamik UPA17-imi Aningaasaqarnermut Akileraartarnermullu Ataatsimiititaliamut nassiullugu.

Siunnersuutip Inatsisartuni siullermeerneqarnera

Siunnersuummi siunertarineqartut partiinit tamanit Naalakkersuisullu akissuteqaataanni taparserneqarput aammalu amerlanerussuteqarluartut allannguutissatut siunnersuut ingerlaqqinnisami naapertuunnerpaatut oqaatigineqarpoq, tassa ilanngaateqarsinnaatitaanerup sakkutut atorneqarnissaa allaffissornerup tungaanit isigalugu itisilivigineqartariaqarmat aammalu iluarsaanissamut pisariaqartitsinerup, ilanngaateqarsinnaatitaanerup sunniutaata kiisalu isumaginnikkut isiginiagassat akuutinneqarsinnaaneritut periarfissat akornanni oqimaaqatigiisitsiniarnissaq misissorneqartariaqarmat.

Ataatsimiititaliap siunnersuummik suliarinninnera

Naalakkersuisut allannguutissatut siunnersuutaannut tapersiineq ataatsimiititaliamit maluginiarneqarpoq, tassa siullermeerinninnermi periarfissatut kiisalu Naalakkersuisut allannguutissatut siunnersuutaanni periarfissatut taaneqartut ilaatigut assigiimmata aammalu ataatsimiititaliap tungaanit assut pingaaruteqartutut isigineqarmata, tamatumani:

- Inunnut inuussutissarsiortunullu akileraarusiisarnermi atugassarititaasut pitsanngorsarniarlugit sulinermi ingerlasumi siunnersuutikkut anguniarneqartut pissusissami-soortumik ilanngunneqarsinnaammata, taakku piffissami ajornartorsiorfiusumi sakkussatut naleqquttuusinnaammata.

- Iluarsaanissamut pisariaqartitaviit, taakkulu iluarsiiviginnissaat kiisalu sanasunut ilanngaammik atuutsitsilernermit atatillugu isumaginninnikkut isiginiagassat itisilerneqarsinnaammata.
- Akileraartarnermut inatsisikkut nalinginnaasumik ilanngaateqartitsineq, tamanna sioqqullugu aningaasatigut atugassarititatut immikkoortinneqartunut sanilliullugu ataatsimut qanoq sunniuteqassanersoq erseqqinnerusumik missingerneqartariaqarmat.
- Akileraartarnermik ingerlatsiviup atuutsitsilernissaa naatumik nassuiaatigineqartariaqarmat, tassa ilanngaammik atuinermit uppersaasiinissamik piunasaqaammik atuutsilertoqartariaqarmat.

Kiisalu sunniutissaa pitsaasoq siunnersuuteqartumit taaneqartoq anguneqassappat ilanngaat taamaattoq qanoq annertussuseqartariaqarnersoq eqqarsaatigalugu siunnersuut erseqqinnerusumik itisiliivigineqartariaqartoq, tamatumalu peqatigisaanik taamatut ilanngaateqartitsinnermi aningaasaqarnikkut kingunerisassat erseqqinnerusut nalunaarneqartariaqartut ataatsimiititaliaq isumaqarpoq.


Siunnersuutip aningaasaqarnikkut kingunerisassai

Allannguutissatut siunnersuut annertuumik aningaasartuuteqarnermik nassataqartussatut naatsorsuutigineqanngilaq, tassa akileraartarnermut tunngasunik erseqqinnerusumik misissuineq ingerlareermat periarfissallu siuliani taaneqartut ilanngunnissat annertuumik aningaasartuuteqarfiusariaqanngimmata.

Ataatsimiititaliap inassuteqaatai

Tamanna tunngavigalugu allannguutissatut siunnersuut akuerineqassasoq **ataatsimiititaliap isumaqatigiittup inassutigaa.**

Taama oqaaseqarluni isumaliutissiisumilu allassimasutut paasinnilluni ataatsimiititaliap siunnersuut aappasaaniigassannngortippaa.




Jens Immanuel, Siulittaasoq



Randi V. Evaldsen




Peter Olsen



Nikolaj Jeremiassen



Jess Svane



Ane Hansen



Bendt B. Kristiansen